

KERWERED

2019

Ohfang

Gundach ihr lieue Kerwegäschd, ich bitte um Ruhe, ich hab eich was zu sahn,
wie ihr jo alle wisse hat die Kerwezeit in Roth gefang endlich wirrer ahn.
Desweje begrieß ich uff unserm schöne Feschdche jetzt alle Reerer Leit
unn ach die Auswerdische, üwwer die mer sich genauso viel freit.

Alle Vorbereitunge fer die Kerb warn pünktlich getroff,
sodass nix mehr im Wesch stand, dem Zustand: Vollgesoff!
Vors Johr die Kerb, die war jo e richtischi Pracht,
de lieue Gott hat's gut mit uns gemähnt, so hat es ganze Wochenenn die Sunn
gelacht.
Mir hoffe, das werd dies Johr wirrer (/wenigschdens noch e bissje) so sinn,
do schmeckt de Suff nämlich glei besser unn steiht a schneller in de Kopp enin.

Üwwers Johr sinn baseert naderlich wirrer einische Sache,
ihr werrn's glei heere, Einisches devon muschde mer efach in unser Red rinn
mache.
Awwer vorab mo noch was anneres, ihr han's all mitbekomm,
es is was, das hat uns werklich ganz schön mitgenomm.

Spielmanns, unser Wertschaft in Roth, hat zugemach, das hat uns werklich
arisch getroff,
jede Freidach Owend sinn mehr do vun alle Richtunge her hin geloff.
Munter hammer do gespielt immer Karte
unn ach sonschd ware mer alle jederzeit herzlich willkomme in de Gertrud ihm
Lade.
Desweje wolle mer uns jetzt alle ah nochmo ganz recht herzlich bedanke bei de
Gertrud unn ihm Team
unn dodefor werre ner von uns jetzt ah mo noch e kräftischer Applaus do unne
griehn.

Ach die Sach mim Edu, unserm beschde Bäcker, han ihr jo alle kriecht mit,
mir sinn werklich glücklich, dass du soweit wirrer bisch gesund unn fit.
Mir wünsche Dir weiterhin e gudi Besserung
unn sinn heilfroh, dass das so e gudes Ende hat genumm.

So, doch jetzt will ich eich net weiter uff die Folter spanne orrer queele
unn eich desweje mo e bissje von de Reerer Leit unn ihre Tate verzehle.
Zuerschd spielt awwer jetzt noch die Musik unn ab geht die Poschd,
de Hasso unn ich sahn jetzt mo noch an alle vun eich do unne: Proschd!

Unglück im Bus

Es war um de Auguschd erum im letschde Johr,
do han sich e paar Leid aus Roth unn sunschd wo her genumm was Großes vor.
Wichtig se wisse: do war unner annerem de Hebel Tobias unn sei Fraa es
Cassandra debei,
die sich dene Owend extra beide gehall han frei.

Mit rund 50 Mann sinn mer dann noh Derkhäm uff de Worschdmarkt gefahr,
dass do mo ordentlich gesoff werd ...das is jo ganz klar.
Bassend uff was ner jetzt se here griehn,
was do bassert is das war jo eigentlich vorher se siehn.

Schun uffm Wesch dorthi war die Vorfreude groß,
die Erschde han gesung unn die Party im Bus ging los.
Ach uffm Worschdmarkt gings dann arich rund,
die Reerer hans getribb mo wirrer viel zu bunt.

De Wein wurd nur so in sich enin gekippt
unn alle sinn von Stand zu Stand mehr ausgeflippt.
Dodrunner war jo ach, net zu vergesse, de Tobi debei,
der werklich besonnerschd viel Spaß hot an de Sauferei.

Awwer so schää wie's ach war, irgendwann wars Zeit
unn de Bus stand fer die Hämfahrt bereit.
Außerdem is eich jo ach alle gar bekannt,
dass die Reerer schnell Hämweh griehn unn serick misse in ihr geliebtes Reerer
Land.
Alle Mann sinn se dann bei Zeit an de Bus marscheert,
net dass ma is zu speet unn grieht noch hinnerher defoneert.
Glücklicherweise han se alle dann de Bus nochmo gefunn
unn sinn torkelnd ingestieh, vum Alkohol ganz benumm.

De Tobi hat sich dann näwer die Milääna uff de Sitz geschmiss,
dass die hat nur so vor Schock die Aue uffgeriss.
Gemach hat er dann noch e bisje Radau, um alle zu halle wach,
weil mir sinn, Zitat Tobi: „die Saufkompanie aus Roth, e super Sach“!

Doch uff ämo wurd de Tobi ganz schää ruhisch unn hat uffgeheert mit dem
Krach,
was fer die gut war, wo han e klänes Nikerche im Bus gemach.

De Björn Dick guckt zufällig de Tobi aahh
unn es hat ihm vun dem Anblick faschd die Sprach verschlah!

„Was hatten der? Zahnweh odder was? Dem werre grad die Backe so dick,
hoffentlich geht die Schwellung moije wirrer zerick!“
Ganz langsam hat de Tobi die Backe uffgebloß, ich verarsche eich jetzt net,
das hat ausgesieh als wanner zwä Lutscher in de Backe vergess hät.

Oowee, denkt de Björn, alleweil verwandelt der sich,
vom Hulk zum Tobi iwwer de Hamschder zum Kugelfisch!
Die Kraft hat unser Tobi jo in de Owwerarme, das is gar kä Frag
unn weil se nur dort is, hat die in seine Kiefer beim steigende Druck jetzt
völlisch versagt.

Die Lippe hotter zesammegepresst, die Muschkulatur im Kiefer hots faschd
feress,
doch es hat em alles nix genitzt,
wie die Fontäne am Springbrunne isses ausem eraus gespritzt.

In Zeitlupe is das Gemisch aus Weinschorle unn Wärschdscher in die Luft
gestieh, hat sich an ihrem Wendepunkt wehe de Schwerkraft kurz gehall,
verteilt, unn is komplett uff de Björn Dick druff gefall.

Dem Björn, dem ging das zu schnell, do hat er mol ganz bleed geklotzt,
normal isses bei ihm immer die Spielweise vun seim geliebte FCK, die ne so
ankotzt!

Schnell de Bus angehall, uff die Deere unn ab enaus,
bevor es kommt noch meh ausm Tobi eraus.
„Do geht ma ämo fort, schun robbt der so e Ding“,
heert ma es Cassandra fluche, währenddesse se muschd Tempos fer die
Reinischung zesamme suche.

Alla gut, was mer net alles dud fer seine Mann,
wenn der besoff is unn mo wirrer gar nix mehr kann.
Draus vorm Bus hat de Tobi sei Pulli dann noch ausziehn misse, weil der hat
echt gestunk,
noh dem was er hat de Owend üwwer alles so getrunken.

Langi Red, kurzer Sinn,
ab gings halb naggisch wirrer in de Bus ein.

Uff de restlich Fahrt gabs dann als mo noch e paar Zwischefäll,
weshalb er hat e Hela-Plastiktutt kriecht, wens mo wirrer gehn muschd schnell.
Die annere han sich bis häm die Nas fescht halle misse zu,
bevor se noch debei breche, weil de Gestank em geloss hat gar kä Ruh.

Dehäm ankumm, is de Tobi dann ganz stolz, ihr misses eich bildlich vorstelle,
mit seiner vollgebroch Hela-Tutt Richtung Schulstroß spazeert,
was die annere hat dann so richtig, awwer naderlich net die Cassandra,
ameseert.

Wobei mer sahn muss, do is die Cassandra schun wie ihr Schwester,
die schockt das nimmi die zwä Mäd,
die Schwester hat dehäm nämlich genau so e Gerät!

Die Musik speelt em Hebel Tobi e Lied,
ich mähn de Bus war zwar net wie nei, awwer du musch jo net mache glei so e
Sauerei.

Spaß aus der Tube

Ach die Biedingers, diesmo war's es Meike (die älschd Tochter), han in dem Jahr wirrer was Scheenes getribb, sodass es geheert uff jede Fall in unser Red geschribb.

Änes Dachs is es Meike nämlich mo inkaafe gang, wo's gemacht hat fer sich e werklich guder Fang. Wäschmittel in ner schmale Tub hat's do im Regal stehe gesieh, „Ei, do grieh ich es Wäsche dehäm ach mo ohne Wäschmaschin hieh!“

Weil es Meike hat immer so besonnere Farwe oh, die komme bei de Biedingers werklich selten mit Sauermache droh.

Desweje muss es Meike als wochelang warte bis ihr Owerdäle sinn wirrer frisch unn sauwer gewäsch, das wollt se jetzt uff käne Fall noch länger mitmache, das persönliche Pech.

Schneller wollt se ihr Klamotte nämlich einfach mo wirrer im Schrank drin han unn net ewisch uff die warte bis die sinn dehäm mit Wäsche dran.

Kaaf hat es Meike dann die Tub Wäschmittel im Nu unn, dass es e cremischi Konsistenz hat, muss mer sahn dezu. Dehäm okom hat se net lang gefackelt unn direkt es Waschbecke gemacht mit Wasser unn der neie Waschcreme voll...

„Eeeendlich kann ich mo mei dreckisches rotes unn gelbes Top wäsche...das is jo werklich super toll!“

Die Owerdäle ausgewäsch unn zum Trockne uffs Wäschereck gehong, es war werklich kä großi Sach, die Tub mit de Wäschcreme drin hat's zur Uffbewahrung in de Zahnputzbecher gemacht.

„Das Zeisch, das werr ich in nächschder Zeit uff jede Fall nommo brauche, weil das is echt praktisch unn dud jo schon werklich was dauche!“ Mehr hat sich's dodebei gedenkt jo net, es is uff die Arwet gefahr unn de Roger is uffgestann ausm Bett.

Wach war der noch net so ganz gewähn, awwer trotzdem wollt er sich im Halbschlof schon mol butze die Zähn.

Die Zahnpaschda druff, die Zahnberschd in de Mund,
das hat sich de Roger mit noch halb zune Aue so ganz efach gedenkt, zu so
frieher Stund.

Wie jede Moije hat er ohgefang sich zu butze die Zäh,
awwer irgendwas war annersch...die Zahnpaschda hat geschmeckt werklisch
nimmi schä.

Noh dem frische unn angenehme Minze hat die uff jede Fall geschmeckt mo
net,
was awwer, so hat sich's de Roger gedenkt, dro dran leiht, dass er völlisch
verschlof grad erschd uffgestann is ausm Bett.

Weiter gebutzt unn geschrubbt hat er sich also die Zäh, die Zahnpaschda hat
immer eklischer unn chemischer geschmeckt,
das kann doch jetzt nimmi do droh leihe, dass de Wecker ne hat heit Moije so
friehe geweckt.

So rein fer die Kontrolle unn ohne was Beeses zu ahne, hat er efach mo uff die
Rickseit von de Tub geguckt
unn noch net 3 Sekunne später hat de Roger die Zahnpaschda so schnell es
geht ausgespuckt.

Was do drufgestann hat, konnt er jetzt awwer werklisch net glawe,
„3in1 Waschcreme: hohe Sauberkeit, Weichheit unn satte Farwe“.

Do hat sich de Roger jo werklisch gebutzt mit Wäschcreme die Zäh..., gedenkt
hat er sich: „Das do, das kann doch jetzt net sinn!“
Ihr kenne jetzt äns unn äns zesamme zehle, das war genau die Wäschcreme,
die es Meike gestellt hat zavor in de Zahnbutzbecher enin.

Em Roger awwer war die Sach so peinlich gewähn,
dass er konnt mit der Geschichd net rausricke dehäm.

Doch nur e Moije später, an nem Samschdach am Wocheenn, jetzt hallend eich
fesched,
jetzt kommt an der Geschichd jo werklisch es aller Beschd...
isses Nicki ganz verleschen und vorsichtisch an de gedeckte Friehesticksdisch
komm:
„Ihr Leit,“, hot's gesah, „ihr glabend net was mir do is ewei baseert...
ich han ausversehn fer's Zähbutze die Wäschcreme genomm.

Ich hans jo erschd garnet gecheckt,
naa, naa, han ich gedenkt...hat Colgate wirrer e neier Geschmack entdeckt!“

Es Lache konnten se alle nimmi unnerdricke
unn jetzt war's ach fer's Meike an dem Punkt eraus zericke.
„Das is mei Wäschcreme, es dud mer läd, ich han die do in de Zahnbutzbecher
gesteckt,
awwer ihr misse wisse, ich han net mit Absicht e beeser Streich fer eich
ausgeheckt.“

Ach ehr Leit...speelt die Musik derer Familie e Lied zur Ehr,
jetzt wäs ah jeder, wo ihr han eier schöne, glänzende Beissercher her!

Handy in der Landwirtschaft

Zwo Baure aus Roth, de Wilking Seb unn de Liar Sven, han im Summer im letschde Johr wie immer geschafft uffm Baurehof draus, wofor se schon wirrer frieh moijens gang sinn vors Haus.

Schwer geschafft han se de ganze Vormittag lang, weil sie sinn mim Grubber üwwer de ganze Acker gang. Geflüscht werre muschd das Stick Land mo mit der groß Maschin, das wollten se unbedingt an dem Dach noch fertisch kriehn.

Noh e paar Stunn awwer, sie hotte werklich schon viel geschafft, han sich die Zwo dann mo jeweils e kaltes Bier beschafft. Verzehlt unn gequatscht wurd ganz munter unn heiter, es is noch e bissje Zeit bis die Arwet geht wirrer weiter.

De Traktor mim Grubber hat direkt näwe dro gestann, sodass ma sich gemütlich do dran anlehne kann. Awwer schneller als se konnte gucke, war die Mittagspaus ach leider schon vorbei unn es ging wirrer weiter fer die Zwo mit de Schafferei.

De Liar Sven hat sich nommo uff de Traktor druf geschwung unn de Wilking Seb hat seine Nohmittag bei de Kieh im Stall verbrung. Spät am Owend, ganz fertisch von dem anstrengende Dach, sinn se beide dann ersch kumm wirrer häm, de Sebi wollt sich efach nur noch mit e bissje was zu Esse uff die Couch vors Fernseh lehn bequäm.

„Jetzt check ich nur noch schnell mei Handy noh neie Nachrichte uff Whats App ab“, hot er sich gedenkt, „awwer ich wäiß net wo ich das Ding wirrer abgeleht hab.

Das muss doch eigentlich in meiner Hossedasch sinn drin, oh man, immer die Sucherei, das kann doch net sinn!“ Es Handy war werklich wie vum Erdbode verschwunn, de Sebi hat's im ganze Haus gesucht unn net gefunn.

Plötzlich kam's em wie e Blitz in de Kopp geschoss, „Ach du Scheisse, jetzt wäiß ich wo ich han mei Handy geloss! In de Mittagspaus han ich das vorne uff de Traktor vum Sven geleht,

ach Gott... jetzt werd awwer sinn schun alles ze speet.

Vergess han ich das Ding wirrer vum Traktor weg se hole,
Oaaaa Nääää...ich kennt mer grad de Arsch versohle!
Beim Fahre is es Handy doch jetzt längschd gefall erunner
unn wahrscheinlich is es gerot dann noch unner die große Traktorräfe
drunner.“

Gedenkt hat sich de Wilking „Ewei muss ich schnell de Sven ohrufe!“,
bis er gemerkt hat, dass er das ohne Handy brauch gar net erschd versuche.
Mit de Nicole ihm Handy han se dann de Sven erreicht
unn de Sebi hat ihm die ganz Geschichd gebeicht.

„Ohje, das han ich net gesieh, dass uff meinem Traktor dei Handy druffleiht“,
hat de Sven gesah,
„Ich bin dann anscheinend mit dem Ding druff efach losgefah.
Wart emol, ich geh mo raus unn gucke, ich glawes jo uff käne Fall,
dass das Handy do noch irgendwo leiht, awwer ich suches mo üwwerall.“

Doch als de Sven gang is zum Traktor unn noch bevor er ohgefang hat se gucke
wo das Handy komm is hieh,
hat er schun aus de Ferne das Ding vorne uff der große Maschin leihe gesieh.
„Sebi, ich glabs jo net!“, hat er am Handy zum gesah,
„Ich bin werklich de ganze Dach mit dem Telefon vorne druff erum gefahr!
Dass das noch do leiht is jo werklich e Wunner,
das is eigentlich unmöschlich, dass das bei dem Geruckel gefall is net erunner!“

Die Musik speelt em Sebbi e Lied von ner Bauernregel, die besagt:
„Lässt der Bauer das Handy auf dem Trecker liegen,
hat er Probleme Anrufe und Nachrichten zu kriegen!“

Eine Bootsfahr die ist lustig....

„Jeder Topp find ah sei Deckelsche.“, das is e Spruch dene jeder kennt,
mit annere Worte, mer find seine Partner an de Seit, dene mer sei Eigen nennt.
Ganz klassisch werd dann von änem Partner gefroht,
„Ei willsche mich heirate?“ unn bei me „Ja“ werd dann de Himmel vor lauter
Herzjer rosarot.

Die Fraue stecke das subber weg, die Männer dagege denke spätestens korz
defor,
„Ach er Leit, was mach ich dann, ich wollt doch in meim Läwe noch soviel
mache,
was bassert jetzt, wenn die sich in nem Johr verwannelt in so e richdischer
Hausdrache?“

Doch dodefor hat mer sei Kumpels, die denke äfach mit
unn nemme dene arme Mann es ledschde mol in seim Läwe uff so e rischdischi
Sauftour mit.
So wars dann ah, die Leit sinn gesetzt,
unn zum ausgemachte Termin werd noh Landstuhl an de Bahnhof gewetzt.

Weil mer sei Leit kennt, sorgt mer vor, dass sich werd benumm,
mer hat kää Geld sowie Mühe gescheut unn äner angaschiert unn als Uffbasser
mitgenumm.
Es Ziel war Saabricke, dort is mer Rats fatz,
dort kann mer uff de Saar rumschibbere mit so coole runde Grilldonuts.

So e runder Donut brauch awwer ah e Kapitän, der das Ding dud bewehe,
unn wer machts? Kenne ner das schunn vorraussehe?
Do e paar Heiser nuffer do wohnt der Mobbel,
genau, kä geringerer als de Christoph, bekannt unnerm Name Dobbel.

Das war ah der, der die Truppe soll sammehalle,
dass se sich net verliere, odder aussem Boot rausfalle.
Bevor mer also losschibbere kann uff derer Saar,
brauchs e Inweisung fer de Kapitän, das is ganz klar.

Do fahre ah noch annere Schiffe uffem Wasser die sinn größer als mir,
deswehe kried de Christoph alles erklärt unn die annere laade schunn mol es
Bier.

„Also in de Mitte das nennt mer Fahrinne, dort fahre die Große, dort bleibsche weg,
wenn die komme musche sinn bereit
unn dei Bootsche ganz flott lenke an die Seit.“

„Eijo“, saht de Dobbel, „das is doch net schwer,
außerdem is do jo net soo viel Verkehr!“
Also alle Mann druff, die Flasche zu me Proschd,
Leine los, Vollgas unn ab geht die Poschd.

Sie sinn schun faschd, ich sah mol, zehe Meder gefahr,
kommt am Horizont e Schiff dem Donut ziemlich nah.
De Dobbel besinnt sich direkt: „Was sahder, weg von dene große Kahne,“
erumgelenkt Richtung Ufer unn uffgeress dene Gashahne.

So sinn se dann ungebremst mit Speed ins Grünzeich von dem Ufer gewetzt
unn der Donut der hat, ...na, wie nennt mers in de Schifffahrt? Ach ich sahn mol
„uffgesetzt“.

De Doppel driggt de Motor mit der Schraub in de Bode enin, das hat sich
ohgeheert wie wenn se im Stähbruch in Geddebach de Brecher starte,
awwer beweht hat sich nix, wenn die Schraub Stäh ausem Bode reist,
was willschen dann ah erwarte?

„Stoßen uns mol ab!“, hatter geblärrt,
awwer die Schreie han sich nur in seine Jungs ihrem Gelächter verärrt.
„Ach alleweil geht’s, mer sinn faschd frei“,
doch der Donut is rund, er kenne mer glawe, war das e Trudelerei.

Bei jedem wars vor de Aue schun total verschwumm
unn als sinn se wirrer unn wirrer im Kreis erum!
Irgendwann noh ner gefühlte Ewischkeit hat sich das Ding dann wieder gefang,
ei Gott sei Dank isses net unnergang!
„Hat niemand gesieht“, hat sich dann de Dobbel gedenkt
unn das Grillgefährt wieder Richtung offenes Gewässer gelenkt.

Die Musik speelt em Kapitän Iglu e Stück,
wenn de mim Donut feschedstecksch, muss die Crew mache: „Links, rechts, vor,
zurück, das macht Spaß, das bringt Glück!“

Fußballtraining

Es is noch net so lang her, do is Folgendes baseert,
bassend alle gar uff unn her geheert.

Es war an nem ganz normale Fußballtrainingsdach von unsre Buwe aus Roth
unn Umgeschung,
sie muschde wirrer viel renne unn de ganze Owend bleiwe in Beweschung.

Ach de Patrick Gebhardt, unser Paddi, aus Roth war debei gewähn unner der
Truppe,
trainiert hat er hart, mit voller Anstrengung unn ganz ohne Mucke.
Sei Trainingsklamotte hot er schon an, wie er mim Audo motiviert zum
Sportplatz is ohgeprettert,
„Ei, do kann ich direkt unn ohne Umziehe anfangen, ich bin doch net ganz
bedeppert!“

Noh ner gude Stunn, alle warn se völlisch außer Atem unn hotte schmerzende
Bän,
wollten se sich dann frisch mache unn dusche gehn so schön.
Drauß warn die Temperature ah noch dezu relativ hoch gewehnt,
weshalb se han die Dusch unn die frische Klamotte noch meh herbeigeseht.
Voller Freude uff die anstehend Erfrischung is de Paddi in die Umkleid spazeert,
näwedroh hat er schon es Wasser vun de Dusche plätschere geheert.

Jetzt nur noch schnell es Duschgel, es Handtuch unn die frische Klamotte aus de
Sporttasch hole,
dann kanns fer de Paddi ah direkt losgehe unnerm angenehm kühle Wasser
mim Erhole.
„Ihr Leit, wo is dann mei Sporttasch komm hieh?“, hat mer der Paddi plötzlich
durch die Umkleide schreie geheert, „Hat die äänner vun eich do irgendwo stehe
gesieh?“

Alle han se ganz unschuldig unn wie wild geschüttelt ihr Kepp,
weßhalb de Paddi nur noch äns geschloss hat: „Die verarsche mich doch grad
unn wolle mache mit mir de Depp!
Nää, do hert bei mir de Spaß uff!“, hat de Paddi voller Wut gekrisch,
„Rickend sooffoort mei Sporttasche raus, ewei awwer zackisch!“

Awwer die annere han immer noch gemacht als wisse se von nix
unn han sich liewer mo vum Agger gemacht ganz fix.
Do is em Paddi dann endgültig de Krache geplatzt,

sei Stimm hat vor lauter Wut unn Zorn schon gekratzt:

„Dass ner das jetzt durchziehe, do werr ich eich wirklich bees devor sinn,
in der Sporttasch sinn mei Handy, mei Geldbeutel, mei Turnschlappcher, mei
Faltecräm, Hoorspülung, mei Puder unn alles annere drin!

Ich brauch das doch alles, fer meine schöne Body, das wisse ner genau...,
was ner do mache is vun eich ganz unn gar net schlau!

Ich kann doch net ungeschminkt unn total zerzaust,
unner die Leid, aus dem Sportheim enaus!“

Ohne se üwwerlehe hat sich de Paddi e frisches, fremdes Trikot vum Sportheim
efach gekrallt,

hat sich das üwwergezoh, is in sei Audo gestieh unn hat die Deer fescht
zugeknallt.

Zornisch unn richtisch ingeschnappt hat er dann de Sportplatz verloss
unn is direkt Richtung Roth mit seinem Audo geschoss.

Dehäm ohkomm is er immer noch uff 180 gewähn:

„Was do in dem Verein abgeht, das is doch wirklich nimmi schön!“

Gekocht hat in ihm hoch nur noch so die Wut,
die Verzweiflung hat mer in seine Aue gesieh,
sodass em de Paddi schon e bissje läd dud.

Ins Schlofzimmer is er gang um sich endlich frische Klamotte fer die ersehnt
Dusch se hole,

do hät er sich am Liebschde kenne de Hinner selbscht versohle.

Ordentlich unn fein säuberlich gepackt hat do sei vermisst Sporttasch ohne was
zu sahn uffm Bett gestann.

„Ach Gott, das do glab ich jetzt net! Sah, dass das do jetzt net woher sinn kann!

Ich muss mich jo schäme, uffgemach han ich e rieße Fass

unn dehäm uff meim Bett steht das geliebte Teil von Adidas!

Alles do, inklusiv meim Beautycase das is ja suupii toll

unn ich Trottel han mei Kollesche so verscholl!“

Die Erleichterung vom Paddi war wirklich arich groß,

doch glei dennoh gings dann ah schon mim schlechte Gewisse los.

Schnell hat er sei Handy aus de Tasch geschnappt unn mim Tippe in de Fußball
WhatsApp Grupp ohgefang:

„Sorry ihr Männer, ich muss mich entschuldiche dofor, dass ich eich vorhin
falsch verdächtischd han.

Die Sporttasch hat seeleruhisch geläh in meiner Stubb uffm Bett dehäm.
Ich kann eich sahn, dass ich mich fer mei Verhalte heit Owend werklich schäm!“
Seit dem Dach hat er sich im Training nimmie unner sei Kollesche gesellt,
sondern sich direkt im Kurs „Bauch, Beine, Po“ angemeld.

Spaß bei Seit, die Musik spielt fer de Barbie Ken e Liedche vor,
ohne mei Sportdasch bin ich doch echt verlor.

Das Model unn de Alkohol

In de nächschd Geschicht wolle mer jo niemande blamiere,
deshalb muschde mer dem Kerl sei Name zensiere.

Als Tarnung hammer deshalb fer dich de Name Model gewählt,
mir hoffe dodemit fühlsche dich net ganz so beschämt unn gequält.

„All-You-Can-Beer“ für 10 Euro war an nem Owend vor paar Woche im
Reimsche gewähnt die Devise,
weßhalb sich ach unser Model hat gedenkt: „Do kann ich jo mo werklich viel
Bier fer wenisch Geld in mich erin gieße.

Als die Party dann schun fortgeschritte war,
hat unser Model de Schnaps gefunn...das war jo ganz klar!
Havanna ging in dene Kerl beachtlich viel enin,
obwohl de Schnaps war in dene 10 Euro net mo mit drin.

Irgendwann warer naderlich dann nimmi so fit druff
unn wollt sich schaffe uff de Sonnehof de Bersch enuff.
„Ich gehn jetzt häm unn leh mich in mei Bett.“

„Ei Model, mir bringe dich häm, mir sinn jo zu zwett.
Du kansch doch selbschd gar nimmi stehe,
geschweiche denn noch richtisch gehe!

Zu dritt ausm Reimsche raus unn zum Glick die erschd Trepp runner konnten se
ne noch grad so halle,
uff ämo awwer laaft es Model efach los, es Eva und es Anna Luisa han ne nur
noch ganz ohne Reaktion seinerseits gesieh uff de Bode knalle.

Äner vun dene Zwo is dann mit schnellem Schritt ins Reimsche gejoggt,
weil do hat zum Glick de Jung Andreas, unser Sanitäter, gehockt.

„Komm schnell mo mit raus, ewei is vor de Deer e Unglick baseert, unser
Modell is die Trepp runner gefloh,
gebt kä Ton von sich unn hat sich e Platzwund am Kopp zugezoh.“
De Andreas hat dann schnell entschloss: „De Krankewahe muss do her!“,
weil allä e alkoholierter Patient zu versorsche is dann doch e bissje zu schwer.

Als de Krankewahe endlich do war unn se nohm ordentlich gucke kundde,
ging es Drama schon in die nächschde Runde.

„Ich will uff käne Fall mit, Dunnerkeil nochemo,
ich han doch gar nix, ich bin top fit, jetzt efach in meinem Bett zu leihe,
dodrüwer wär ich arich froh.“

Zwo Brechercher später wars dann awwer mit seiner Durchsetzungsstärke
vorbei
unn er wurd endlich uff de Liege feschdgeschnallt, einwandfrei.

Der Kerl hat de Anblick vun nem antike Model in Statueform gehat, so hat er
jedenfalls uff derer Liege geläh,
uff de Seit, de Kopp uffm Arm abgestützt wie wenn nix wär, ganz entspannt
unn werklich super schä.

Von Schmerze war do nix mehr se siehn, iss jo ach verständlich bei so viel
Havanna unn Bier im Blut;
vor allem wenn ma sich's ach, halb Schnaps, halb Cola selbschd mische dud.
In Kusel im Krankenhaus hat es Model sich uff Grund seines Alkoholrauschs
naderlich eher wenischer gut benomm
unn hat so mancher thailändischer Schweschder ihre letschde Nerv genomm.

Getönt hat er dort: „Warum bin ich dann eigentlich do? Ich han doch gar kä
Schmerze; ich merke kä bissje was!“
„Ei, guter Mann, das werre se doch wisse, ich behalle Sie jo ganz sicher net
efach so do nur zum Spaß!

Ich han doch grad ihr Platzwund an de Stärn genäht,
awwer bis Sie das merke is es jo längschd vorbei unn zu spät.“

„Wie konnt dann das so ausm Ruder laafe?“, hat unser Model noch gesah, „Ich
wollt doch nur in mei Bett unn jetzt komm ich bestimmt ah noch in die
Kerwered!“
Noh der Aussag konnte mer efach net annersch wie die Geschid schreibe in die
Red erin, das wärsch du dir kenne denke,
mir wollte dir dodemit e Erinnerung an dene besonnere Dach mo schenke.
Mir sinn froh, dass nix Schlimmes is baseert unn das geheert der noch gesah:
Es geht nie gut aus, wenn ma im Vollsuff mim volle Gewicht uff de Bodde uff
schlaht!

Die Musik spielt unserm Reerer Model vom Sonnehof se Ehr,
wenn doch nur net so viel Schnaps in unserm schäne Reimsche gewähnt wär.

Bollerwagenfahrt

An de 30-Johres Feier vun de Damefußballmannschaft war fer so e paar Reerer es Wäze e arischer Genuss, weshalb es geendet is wirrer in nem große Suff.

Do ded mer als Mol mäne, dass bei so Kranate es ä oder anner Wäze dud de Gehirnzelle schade. Zu später Stunde han se es Sporthäm hinner sich geloss unn es hat net lang gedauert als ne is e super Idee in de Kopp geschoss.

„Häm laafe wolle mer jetzt net, weil die Bä sinn echt schwer unn de Bauch wejem Wäze fett.“ Genumm han se, weil Audofahre ging jo nimmi, dann de Bollerwahe, um mit dem mit Vollgas Richtung häm se fahre.

Zum Glick gab's zum 30.Jubiläum im Sportheim schöne 30er Schilder, do han se äns mitgehn geloss, um's ach richtisch ze kennzeichne, ihr schnelles unn sicheres Geschoss.

Gebabbt han ses an de Bollerwahe droh, weil Safety First steht jo an oberster Stelle unn mir wolle jo ah net, dass die Blau-Weiße mit uns schelle.

Startklar warn se dann gewesst, han Ricke an Ricke gehockt, wie enin gepresst. Unn was e Glick trifft mer nachts um Zwä uff de Stroß noch jemand an „Sah mol Eva, hasch du eigentlich e Anhängerkupplung an deim Audo dran? Mir bräuchte bissje Starthilfe, um in Fahrt se komme!“ Saht die Eva: „ Ne das net, awwer trotzdem käää Probläm, ich han debei de Domme!“ Noh 3-4 Stubber ware se dann im Rolle, de Bersch sinn se runnergetuckert, sie hatte faschd alles unner Kontrolle.

Dezu sahe muss mer jedoch, dass das Geschoss nimmi so ganz verkehrstauglich war, „Oaa näää, die Lenkung is kabutt,... awwer... das macht uns jo nix, es werd trotzdem weiter gefahr!“

Mit Gewichtsverlagerung ging das Ding um die Kurve erum, de Sebastian Vettel hät ne noch net äh Zentimeter abgenumm.

Unn weil's jetzt net annersch konnt komme mit dene abenteuerluschdische
Mäd,
is wie ausm Nichts unn ganz plötzlich e Polizeiaudo in de Ferne uffgetaucht,
„Ach du Scheisse, ewei is awwer alles zu spät!“
Es Herz hat bei ne geschlah uff ämo richtisch rund,
es Gesicht wurd weiß unn starr, was hat ausgesieh gar nimmi gesund.

Schnell die Fies aus dem Ding raus zum Bremse uff de Asphalt gestellt,
dass der Bollerwaah uff de Stell jetzt anhält.
Rausgehupst sinn se, so schnell wie noch nie,
Richtung gewechselt unn schunn hat mers se nimmi gesieh.

Mit Vollgas han se sich dann geschafft erunner vun de Gass,
weil e Begegnung mit de Bulle im volle Kopp, das macht jo werklich kä Spaß.
Näwe hinner me Busch han se sich schnell versteckt, das war kä Sach,
unn vor lauter Angschd hätte se sich faschd in die Hose gemach!

Awwer Gott sei Dank sinn die weiter gefahr unn die Mäd verschont geblibb,
bei dem riskante unn durchaus net erlaubte, kläne Tripp.

Die Musik spielt dene Rennfahrer e Lied: „Mein Bollerwagen der fährt 210,
schwupps, die Polizei haaaaats nicht gesehn. Das macht Spaß!“

Neischdie Technik

Mer schreibe es Jahr 2019 unndie Welt is total verrückt,
weil jede Dach muss mer was Neues lerne üwwer unser fortschreitende
Technik.

Die Junge, die mache sich do absolut kä Kopp,
wenn mers net wäs, werd efach mol druffgedriggt uff dene unbekannte Knopp.

Die ältere Generation die dun sich bei so Sache schunn schwer,
na alle, die Bedienungsanleitung läse vom erschde Fernseh, das im
Wohnzimmer noch steht, is jo ah schunn 40 Jahr her.
Aber trotzdem werd net de Kopp in de Sand gesteckt, mer will jo uff jeden Fall
uff de Heh bleiwe
unndah mol mim Enkelsche Whatsapp, Email unndSMSse schreibe.

So wollt e Fraa aus de Heinrichgass in Zukunft ah iwwer Facebook erreichbar
sinn

unndis direkt in so e Handy-Fachgeschäft enin.

Ihr Mann saht noch: „Was willschen mit dem neimodisch Ding?

Kriehsch dehäm grad die Weschmaschine oh!“

„Sei doch ruisch, mähnsche ich will bleiwe mit de Technik hinnedroh?“

Mache kunnter nix unndirgendwie warer jo ah gespannt
unndso sinn se mim nei Handy unnderm Arm hänggerannt.

Uffem Kischedisch hat mers dann mol ausgepackt unndingeschalt...

„Ei ei ei, sinn das kläne Knepp uff dem Ding, die siehn ich jo faschd net...ich glab
mer sinn doch zu alt.“

Ach was, zu alt is mer nie, das kann ich eich sahn,
unndan die kläne Knepp gewähne ner eich ah noch drahn.

Die Hannelore hat gedenkt: „Na, was soll bassere, do werd mol druffgedrückt,
frieher war ich bei so Sache ah schon recht geschickt.

Klick, Klick, Klick, ach macht das Spaß, das is doch garnet so schwer...

Ich zeich ders mol, do Herrmann, komm mol her.“

Funktione hat so e Telefon ganz, ganz viele,

was se direkt rausgefunn han..., das kann sogar Musik abspiele!

Unndie war ah direkt mol aktiviert, doch ebbes hat se dann doch gesteuert
unndzwar, das mer in de Heinrichgass seit drei Stunn es selwe Lied uff voller
Lautstärke heert.

„Herrmann, also langsam nervts mich schon awwer ich kriehns nimmi aus,

Dunnerkeil, wie kumm ich dann jetzt aus dem Musikplayer raus?
Das gebbts doch net, ich schmeiß es grad ausem Haus“,
unn zack, wie aus Zauberhand hert mer jetzt die Musik von drauß!

„Aaaah, Herrmann, mach was, das kann mer jo net die ganz Nacht heere,
do dud sich jo ah die Nachbarschaft beschwere!“
Der geht naus unn holts wirrer rinn,
„Mer brauche Hilfe, das macht alles kä Sinn.“

„Ich nemms, mir gehe mol zu Hildemanns odder Blauthe, die han das bestimmt
schun gemacht
unn kenne uns schnell helfe bei derer Sach...!
Doch mit dem laute Teil durch Roth se schlabbe das geht jo so net,
die Leit denke doch, dass ich se nimmi all hät.

Also muss ich mer was infalle losse was macht Sinn
unn wickel es Delefon mol ganz dick in drei bis vier Gescherrhantücher in!“
Ab ins Dorf mit dem Päggsche, doch unnerwegs werd se noch noh der Musik
ausem Gescherrhandtuch gefroht,
bevor die Hannelore reagiere kunnt werd se erschd mol ganz rot.

„Ei kenssche das net, das is doch vunn de Technik de neischde Schrei,
e Radio im Gescherrhanduch, do kannsche abtriggele unn Musik here debei!“
Schnell is se abgedackelt, weitere Frage hat se net zugeloss
unn is dann direkt Richtung Friedhofsstroß geschoss.

Bei Hildemanns war känner dehäm so hat's änner von de Blauthe ausgemacht,
eins zwei drei, zwä Stunn es gleiche Lied das is genuch
unn ruckzuck war Ruh in de Hannelore ihrm Gescherrhandtuch.

Doch wer jetzt denkt es wär vorbei,
der hat mim Herrmann net gerechnet, der fand nämlich em Nachbar sei E-Bike
de neischde Schrei.
Das hatter gesieh unn war total von de Socke,
er is eniwwer unn wollt sich direkt mol do druff hocke.

„Derf ich mol fahre? Das wär so schää,
das fahre mit dem E-Bike is net so anstrengend unn besser als dehäm uff de
Couch geläh!“
„Naderlich derfche das, das is doch klar,
awwer mach langsam, wenn de das noch nie bisch gefahr.“

„Bin jo net bleed“, denkt de Herrmann unn dud de Hinnere in de Sattel
schwinge,

„Jetzt zeig ich mol, was ich von frieher noch kann, ich war im Radele de
Beschde, das kenne ner awwer singe!“

Die Fieß enin in die Pedale gedrickt,
do isser echt net ungeschickt.

Es Fahrrad nemmt schnell Geschwindigkeit uff, das hät der net gedenkt
unn dann hatter es Hölleteil die Stroß enuff gelenkt.

Doch irgendwie komisch siehts aus, weil langsamer werre dud er net,
er sitzt ah druff als dass ers nimmi ganz so unner Kontroll hät.

„Dunnerkeil, wie kann man dann bremse das Gerät,
die Kurv kriehn ich nie...“, wie er das gedenkt hat wars ah schun zu spät.

Es hat ne sei Talent komplett verloss
unn so isser umgefall unn ohne Rad komplett iwwer die Stroß geschoss!
Die Knie ware uff, die Arme verschrammt,
wie die Hannelore das gesieh hat, kam se direkt mim Gescherrhandtuch
angerannt.

Es Handy spielt de Familie Eicher e Lied,
das mer ah so schnell nimmi ausgried!

Schluss

So ihr Leit, mir han's gepackt, die Red is gehall
unn das sogar ohne, dass äner vun uns Zwo is vun de Läder gefall.
Genug verzehlt, es wird langsam Zeit,
dass ich mich recht herzlich bedanke fer eier Uffmerksamkeit.

Ach, bevor ich's vergess, mir müsse das Ding do näwer mir jo noch daafe
unn dennoch losse mer dann awwer mo so richtisch die Zapfhähn uffm
Kerweplatz laafe.

Mit „Ach unn Krach“ han mer de Strauß dies Johr wirrer nuffer an die Wand
gedriggt,

awwer ich würd sahn: Es is uns doch werklich ganz gut geglickt!

Wie ner siehn kenne hat er diesmo die Farwe schwarz, weiß, gelb
unn is dodemit em Hasso sei ganz großer Held.

Er wollt nämlich unbedingt die Farwe von SWR 1 fer unser Prachtstick han,
weil unser Hasso is großer SWR1 Fan unn hat sich ah in dem Johr geheert
wirrer die Hitparade an.

Desweje konnte mer uns dies Johr fer de Name „Hasso's Nummer 1“
entschließe

unn duhn dene Strauß jetzt mo noch ordentlich mit Wein begieße.

Wo is dann eigentlich unser Boijermäschder? Komm du mol bitte zu uns do her,
beurteil mo unser schöner Strauß unn sah bloß net, dass der nix wär.

Vielen Dank fer das Lob/die gut gemähnt Kritik, mir han jo nix anneres erwart
unn mer sinn froh, dass de zu unserm schöne, neie Strauß do owwe hasch was
gesaht.

Bedanke will ich mich jetzt zu guter Letzt mo noch bei de Anna-Luisa, em Biedi
unn em Niko, die mir geholf han beim Kerwered schreiwe,

ohne die hät ich das net geschafft unn hät's kenne ah glei losse bleiwe.

E großes Dankeschön geht ah an de Maurer Sven „unser Model“, der sich hat
samschdachs uffgerafft

unn hat zusamme mit uns Straußbuwe unn -mäd de Bäm gehol unn ins
Reimsche geschafft.

Ach bei de Zahlreiche, die wirrer e Küche gebackt han will ich mich noch
bedanke,

bevor ich jetzt vun der Läder do runner schwanke.

Die Kerwered gibt's wie jedes Johr wirrer am Bierstand se kaafe,

zum Glick, do müsse ner jo gar net weit laafe.

Im Anschluss an die Red werre mer außerdem mo wirrer e aldi Tradition
uffnemme unn die 3 Erschde danse do unne uff de Gass,
mir würde uns freie, wenn e paar vun eich Gäscht mit mache würde, weil das
wird bestimmt e arich großer Spaß.

Ich sah dann jetzt mo Servus, Tschüss und Good Bye,
ich hoff ihr sinn beim nächschde Mo ah widder alle debei.
Weil die Kerb muss gefeiert wärn, das is jo klar unn bekannt,
denn es is schließlich nur ä mo im Johr Kerb bei uns im schöne Reererland!

Die Musik spielt de beschd Kerb zu Ehr,
wenn doch nur viel öfter Kerb in Roth währ!